

## **Bosna i Hercegovina**

Federacija Bosne i Hercegovine

Tuzlanski kanton

OPĆINA GRAČANICA

OPĆINSKO VIJEĆE

Broj predmeta: 01-05-03935-2013

Broj akta: 01EH-001

Gračanica, 28. 11. 2013. godine

### **Z A P I S N I K SA 13. SJEDNICE OPĆINSKOG VIJEĆA GRAČANICA**

Održane dana 31. 10. 2013. godine u sali za sjednice nove zgrade Općine, sa početkom u 11.00 sati.

Sjednici je prisustvovalo svih 30 članova Općinskog vijeća Gračanica.

Pored članova Općinskog vijeća sjednici su prisustvovali i: Općinski načelnik Nusret Helić, općinski pravobranilac Jasminka Imširović, šefovi službi za upravu Senaida Šaković, Aida Hodžić, Zijad Dedić i Mustafa Bajić, Damir Lukić (IPSA), Mujezinović Svjetlana predstavnic OSCE-a, Selma Hukić, Biro za ljudska prava Tuzla, Larisa Šuša, član Etičke komisije, izvjestioci Saima Zaketović i Vanesa Mahmutović, predstavnici SRD "Drijenča", te predstavnici sredstava informisanja Radio Gračanice, dopisništva TVTK, Gračaničke novine i dopisništvo Dnevni avaz.

Zapisnik vodila Azra Mustajbašić, a vršilo se i tonsko snimanje sjednice.

Sjednicu je zakazao i istom predsjedavao Ibrišević Edin, predsjedavajući Općinskog vijeća Gračanica, zajedno sa zamjenikom Gazibegović Seadom i sekretarom Općinskog vijeća Mujačić Zehrom.

Zapisnik sa 12. sjednice Općinskog vijeća Gračanica usvojen je jednoglasno sa 29. glasova "ZA", bez primjedbi.

Prije nego se prešlo na postavljanje vijećničkih pitanja i kandidovanje inicijativa, predsjedavajući Vijeća je pročitao dopis VMZ Lohinja Gornja koji glasi:

"Poštovana gospodo, poštovani predsjedavajući Općinskog vijeća, poštovani načelnice i poštovani vijećnici.

Obraćamo vam se s nadom da ćete ovo pismo pročitati na Vijeću i vrlo ozbiljno razmotriti naše zahtjeve bez obzira na vašu stranačku pripadnost.

Obzirom da smo dana 27. 10. 2013. godine održali zbor građana na kojem smo razmatrali Nacrt Budžesta za 2014. godinu, u saradnji sa vijećnikom Jasenom Ahmetašević, došli smo do zaključka da Općina Gračanica i za narednu 2014. godinu ne planira asfaltirati niti jedan dužni metar glavnog puta u našoj mjesnoj zajednici, koja je jedina na općini Gračanica neasfaltirana. Takođe smo obavili konsultacije sa stručnjacima iz oblasti niskogradnje koji su nam, istina usmeno, prenijeli da jedan metar kvadratni asfalta sa pripremom na postojećem makadamu koji je

star oko 40 godina, dakle vrlo stabilan, košta oko 25,00 KM po metru kvadratnom. Potrudili smo se i premjerili da ukupna dužina puta od Donje Lohinje (Bajrići) do Mostić-Vrba, odnosno ogranka za Žuže ima 1980 metara. Ukoliko bi se radio put širine 3,5 M sa debljinom asfalta od 7 cm, ukupna cifra bi iznosila oko 170 hiljada konvertibilnih maraka. Trenutno raspoloženje građana naše mjesne zajednice i 7-8 privrednika je, da možemo skupiti (učestvovati) iznos do 50 hiljada KM, što nam govori da uz podršku naše općine i naša mjesna zajednica bi mogla imati asfalt bar kroz centar sela. Sramotno je da u "od posla čaršiji" imamo jedinu mjesnu zajednicu koja nema jedan metar asfalta i često se pitamo da li je to razlog što tu žive 100% izbjeglice. Vrlo dobro nam je poznato da je Općina Gračanica valjala izbjeglicama u nevolji, a isto tako nam je poznato da je i Općina Gračanica imala koristi od samih izbjeglica. Da ne bi ovo pismo ispalo da polemishemo sa Vijećem, mi vam predlažemo da ovo naše obraćanje ili zahtjev shvatiti vrlo ozbiljno i iznađete mogućnost da nam u cjelosti udovoljite ili pak parcijalno, na dva puta na način smanjenja nekih od budžetskih stavki ili dodatnog angažmana kreditnih sredstava kao što ste činili i za ostale mjesne zajednice. S poštovanjem".

Pitanja i inicijative kandidovali su:

Vehid Osmanović je uputio pitanje Službi za poduzetništvo, lokalni razvoj i finansije:

"U kojoj fazi je sanacija klizišta u zaseoku Mehići, MZ-a Gornja Orahovica u sklopu garantnog roka?"

Obrazloženje: Krajem prošle godine firma "Gramat" je izvela radove na predmetnom klizištu. U toku garantnog roka došlo je do oštećenja koja su obilazili izvođači i nadzorni organ i obećali intervenciju, ali je do danas nisu realizovali".

Kandidovao je i inicijativu prema Općinskom načelniku koja glasi:

"Upućujem inicijativu načelniku općine da dvije stavke vezane za mjesne zajednice, a koje su predviđene budžetom i ostaju i u rebalansu, uplati na račune mjesnih zajednica do sredine decembra. Radi se o redovnim grant sredstvima prema mjesnim zajednicama koji su u zaostatku i sredstvima za održavanje javne rasvjete."

Edin Ibrišević je kandidovao inicijativu u ime stanara zgrada ispred kojih se naplaćuje parking:

"Inicijativu upućujem Općinskom načelniku, da putem odgovarajućih službi za narednu sjednicu Općinskog vijeća Gračanica pripremi Odluku o korištenju i uslovima korištenja parkinga, za stanare zgrada ispred čijih se zgrada naplaćuje parking."

Nihad Krajinović je kandidovao sljedeće:

"Nadzor nad nelegalnim otpadom voća-koma.

Obrazloženje: U koliko slučajeva je u periodu septembar-oktobar mjesec, koliko traje sezona pečenja rakije, nadležna služba Općine Gračanica preduzimala mjere protiv vlasnika kazana za pečenje rakije tj. zagađivača korita rijeke Sikoluše koji su kom, otpad od voća direktno ispuštali u korito rijeke Sokoluše i na druga, za to nepredviđena mjesta na općini Gračanica i time onečišćavali vodotoke.

Svjedoci smo da se u pomenutom periodu gradom širio i još uvijek širi nesnosni miris i to se ponavlja iz godine u godinu. Nedavno je upućen i javni poziv građanima koji se na budu pridržavali zabrane odlaganja ovog otpada, da će biti zakonski sankcionisani.

Dakle, pitam u koliko slučajeva su pronađeni prekršioc i koji je iznos naplaćenih kazni?"

Mirza Omerdić:

“Ja u principu imam dvije inicijative, naravno odnosi se na načelnika. Znači jedan naš sugrađanin, ima oboljelo dijete i zamolio me je da iznesem inicijativu da mu se pomogne jer se radi o cerebralnoj paralizi i on traži pomoć koliko je to moguće. Nisu to velika sredstva za liječenje jer se radi o nekih 2.900 EURA. Nešto se dakle sabire po kućama, pa evo upućujem inicijativu načelniku. Ja ću dokumentaciju donijeti na pauzi naknadno jer mi je ostala u autu. Tu je dijagnoza i određeni zahtjev i bilo bi korisno, ukoliko je Općina u mogućnosti, a radi se zbilja o mladom čovjeku i dosta siromašnoj porodici.”

Esma Pašić:

“Za današnju 13. sjednicu Općinskog vijeća postavila bih dva vijećnička pitanja i jednu vijećničku inicijativu.

Prvo pitanje se odnosi na sljedeće. Kada će se izvršiti rekonstrukcija putnog pravca Ritašići-Drama-Klanac, odnosno to je povezivanje putnog pravca sa Pribavom? Kada će doći do spajanja navedene putne komunikacije, obzirom da su i građani u fazi prikupljanja sredstava?

Obrazloženje: Pomenuto naselje se u posljednje vrijeme dosta izgradilo i naselilo, takođe ovim putem se povezuje putni pravac Ritašići-Hajdarovac i izlazak na alternativnu saobraćajnicu. Smatram da bi bilo dobro da se planiraju sredstva u budžetu do kraja 2013. godine.

Drugo pitanje se odnosi na sljedeće. Kada će biti planirana sredstva u budžetu za rekonstrukciju putnog pravca prema SOS Dječijem selu i Bijelim poljima?

Obrazloženje: Smatram da u tom dijelu grada počinje individualna stambena izgradnja, da tu egzistira na stotine porodičnih objekata i bilo bi dobro da se planiraju sredstva u budžetu do kraja 2013. godine.

Vijećnička inicijativa se odnosi na zbrinjavanje pasa lualica. Naime, u posljednje vrijeme smo svjedoci da našim mulicama u gradu, a i ostalim mjesnim zajednicama sve više uočavamo čopore pasa lualica. Kada uzmemo u obzir činjenicu da naša djeca svaki dan odlaze do škole, ulicama se kreću stara i iznemogla lica, ostali građani. Isto tako želim da napomenem, a vjerovatno ste upoznati da je u utorak 29. oktobra u pet sati čopor pasa ušao među 55 ovaca u toru Dilavera Džafića u naselju Seljanuša gdje su napravili pravi masakr. Tom prilikom Omo Džafić, Dilaverov sin bio je na mjestu događaja i priča kako je rastjerao pse vučjake koji su bili bijesni i gladni. Četiri jagnjeta su udavljena, četiri teško ranjena, a dvoje je nestalo. Isto tako želim da napomenem da je nezbrinjavanje pasa lualica ne samo problem na općini Gračanica, nego i u ostalim općinama i kantonima. Ovim putem upućujem vijećničku inicijativu nadležnim općinskim službama, PU Gračanica i ostalim relevantnim ustanovama da HITNO i bez odlaganja preduzmu sve neophodne mjere kako bi se ovaj problem konačno riješio i našim građanima obezbijedila sigurnost i zaštitila njihova imovina.”

Ibrahim Hasić:

“Ja bih imao jedno vijećničko pitanje koje upućujem Službi za javne nabavke. Naime, radi se o sljedećem. Kod izvođenja radova na određenim lokalitetima gdje su zainteresovane strane kao MZ-e itd. smo s vremena na vrijeme mogli učestvovati, ne u nadzoru, već u nadgledanju utroška sredstava po predmjeru, to jest kvantitetni dio nadzora. Međutim, evo u posljednje vrijeme Nerma, koja je otprilike glavni faktor u javnoj nabavci, kaže da to ne može. Nije tu pitanje rješenja o nadzoru, to može biti odluka šefa Službe, može biti odluka načelnika, da predstavnik MZ-e koja je zainteresovana za određene poslove kao npr. asfalt tamo i onamo itd. itd. Znači tražim da mi se odgovori u pismenoj formi i potkrijepi argumentima da na to nemaju

pravo predstavnici MZ-a s obzirom da puno znam, volio bih da manje znam, jer između dvojice ako nema trećeg, krug se zatvara.”

Fadil Mešić:

“Imao bih jednu vijećničku inicijativu koja je upućena predsjedavajućem Općinskog vijeća, a iskoristio bih priliku da čestitam Edinu Ibriševiću na izboru za potpredsjednika SDU BiH. Inicijativa se odnosi na uvođenje vijećničkog sata u Općini Gračanica. To već općine druge rade u drugim kantonima. Znači da se vijećnicima sat uvede u Općini, da to sagleda predsjedavajući, da se odredi dan kada će građani moći biti upućeni i obaviješteni o radu zakonodavnog organa u Općini Gračanica iz prve ruke, znači od općinskih vijećnika. Dajem prijedlog, inicijativu da predsjedavajući uzme na sebe zadatak i naravno sa određenim vijećnicima da to već jednom uspostavi.”

Esad Tursunović:

“Bit ću veoma kratak sa inicijativom za nastavak u vezi puta u MZ-i Stjepan Polje u Sprečanskoj dolini. Pošto znamo koliki neiskorišteni prostor imamo.”

Mirsad Čamdžić:

“Ja imam jedno vijećničko pitanje koje prenosim od džematlija iz mahale Lipa i glasi:

Džematlije sa Lipe pitaju Službu za prostorno uređenje, kakva je situacija sa lipanjskom džamijom?

Obrazloženje: Nakon što je proglašena nacionalnim spomenikom, šta se radi na njoj zaštiti od daljeg propadanja, odnosno da li se na nekom nivou radi na izradi projekta i obezbjeđivanju sredstava za njenu sanaciju, jer je džamija skoro nefunkcionalna. Ako bi stanovništvo Lipe svojim naporima obezbijedilo neka sredstava, koji organ, put i način je za sanaciju. Nalaze se u nezavidnoj situaciji i molim da se pismeno odgovori kako bi imali polaznu tačku za svoje djelovanje.”

Osman Sulejmanović:

“Ja imam dvije inicijative. Prva vijećnička inicijativa upućena je Službi za poduzetništvo, lokali razvoj i finansije i Službi za prostorno uređenje, geodetske i imovinsko-pravne poslove da izvrše obilježavanje i uplanjenje novoizgrađenih i rekonstruisanih lokalnih puteva.

Obrazloženje: U proteklom periodu na području općine izvršena je izgradnja i rekonstrukcija skoro svih lokalnih puteva, međutim to stanje nije adekvatno obilježeno, nije određen putni pojas i nije izvršeno geodetsko uplanjenje puteva pa imamo slučajeve da se pojedini dijelovi puta još uvijek gruntovno vode na pojedincima, što često stvara probleme u korištenju i održavanju.

Druga inicijativa upućena je Poreznoj ispostavi Gračanica, Kantonalnoj i Federalnoj poreznoj upravi, da zajedničkim snagama obezbijede adekvatnije uslove za rad, odnosno prijem stranaka.

Obrazloženje: Porezna ispostava Gračanica smještena je u neuslovnom objektu “stara pošta” koji ne zadovoljava ni minimum potrebnih uslova za rad ovakve službe, teško obezbijediti tajnost podataka, više referenata u jednoj kancelariji, a samim tim i stranaka, nema šalter sale, nema parkinga.”

Zatvoreno je vrijeme za postavljanje pitanja i inicijativa od strane vijećnika.

Aida Hodžić, šef službe za upravu dala je odgovor na pitanje vijećnika Mirsada Čamdžića.

“Ja ću pokušati da odgovorim, a uputit ćemo i pismeni odgovor na pitanje vijećnika Mirsada Čamdžića, za nacionalni spomenik Lipanjska džamija. Tokom nekoliko godina je bilo pitanje rekonstrukcije i obnove te džamije, odnosno izgradnje nove. Međutim, objekat je proglašen nacionalnim spomenikom BiH i on podliježe Zakonu o nacionalnim spomenicima. Izdavanje svih odobrenja za građenje, za rekonstrukciju ili bilo šta, je u nadležnosti Federalnog ministarstva prostornog uređenja. Dakle, nije u okviru nadležnosti općinske službe. A Općina Gračanica je u okviru zaštite tog nacionalnog spomenika uspjela da obezbijedi sredstva koja su utrošena na izradu projekta, glavnog projekta rekonstrukcije, restauracije i obnove tog nacionalnog spomenika zajedno sa haremom oko spomenika. Projektna dokumentacija je dostavljena i gotova u mjesecu septembru i nalazi se u Općini. Sljedeći korak je njena revizija i pribavljanje odobrenja za građenje po toj projektnoj dokumentaciji i onda traženje sredstava za obnovu nacionalnog spomenika. Nažalost, ne mogu samoinicijativno džematlije obnavljati ili vršiti radove na tom objektu, pošto je nacionalni spomenik, to se mora vršiti u skladu sa odobrenjima za obnovu nacionalnih spomenika.”

Predsjedavajući Vijeća Edin Ibrisević:

“S obzirom da smo iscrpili vrijeme za pitanja i inicijative, te kako je to bilo navedeno u početku, a i prema akciji koju smo sproveli i u Općini “kreditiraj volontiraj”, zamjenski predsjedavajući Općinskog vijeća je dogovorio i omogućio da predstavnici Sportsko-ekološko-ribolovnog društva “Drijenča” Gračanica danas ovdje iznesu svoj problem. Pa evo u ime društva Vijeću će se obratiti sekretar društva, izvolite.

Sekretar je iznio sljedeće:

“Hvala prisutnima i predsjedavajućem Vijeća. Ja ću kratko iznijeti problem društva, mada o tom problemu ja mislim već i ptice pjevaju na grani. Naš najveći problem udruženja je trovanje rijeke Spreče i naših sporednih vodotoka, kao što su Drijenča i Sokoluša. Glavni problem trovanja rijeke Spreče nije samo problem udruženja ribara. Taj problem treba da bude problem sviju nas. Znači, oni ne truju samo populaciju ribljeg fonda u rijeci Spreči, oni truju komplet narod općine Gračanica. Međutim u ovih zadnjih godina koliko sam ja sekretar u udruženju, nismo imali podršku apsolutno, pogotovo bilo koje organizacije, da li vladine ili nevladine organizacije na našoj općini. Od Općine Gračanica smo imali nešto minimalno, da tako kažem, neku podršku mada smo i tu ostali osakaćeni. Po ovom pitanju smo se obraćali čak i našem premijeru Kantona, ministrima kantonalnim. Odgovor je samo bio, zvat ćemo vas na razgovor. Na tome je ostalo do dan danas. Njima je najvažnije da zaštite akumulaciju jezera Modrac, a šta će biti nizvodno od akumulacije, apsolutno to njih ne interesuje. Nije problem što ne interesuje njih odozgo, izgleda da ne interesuje ovdje nas. Sav otpad iz kantona, industrije Lukavca i Tuzle dolazi nama u Gračanicu ovdje, šta mi dobijamo od toga. Dobijamo karcinome, dobijamo oboljenja i mislim da smo mi po tome prvi u BiH. Ja ne znam stvarno ovdje koliko smo se puta obraćali inspekcijama, ministarstvima. Mediji su o tome pričali koliko ja znam, šest najmanje TV postaja, kuća o tome je izvještavalo, o trovanju. Međutim, ni jednom, koliko ja znam se Općinsko vijeće po tom pitanju nije oglasilo. I još da spomenem ovdje šta je najveća sramota, što mi u našem gradu imamo kanal otpadnih voda. Znači imamo Sokolušu. I sramota je da mi kada krenemo kroz grad udišemo smrad fekalija. A u jesenjem periodu mi udišemo otpad od koma od rakije. Jedne prilike sam se obraćao nadležnim inspekcijama u Općini Gračanica koji su mi rekli ovako fino. Samnom je bio i kolega predsjednik Skupštine društva. “Skuplja je tužba nego kazna za te počinioce”. To mi je rekao jedan godpodin inspektor. A gospođa šefica mi je rekla fino, “rakija se pekla i peći će se”. Mi ne tražimo da se prekine peći rakija, daleko od toga. Mada, da se ja pitam ja bih zbog takvih stvari uveo šerijatski zakon. Neka se peče rakija ali zna se kako treba

peći rakiju, gdje treba da se odlaže otpad. Gospodin premijer Kantona, naš čovjek, dok je bio član Skupštine Kantona, ovo pitanje je iznosio na Skupštini Kantona i tad su donešene neke odluke. Međutim, kad je naš čovjek došao na funkciju premijera Kantona, on je potpuno postao po ovom pitanju i problemu i gluh i nijem. Sva trovanja rijeke Spreče se dešavaju isključivo u popodnevnim satima i vikendom. Zašto? Zato što u tom periodu su inspektori da li u vikendicama ili slobodni, većinom ih ne možete dobiti. I dok oni dođu naredni dan, šta se dešava. Taj isti otrov je otišao nizvodno. Uzimanjem uzoraka dan poslije trovanja se ustanovi da je sve u redu. Međutim mi smo uspjeli prošle godine da dobijemo te inspektore preko ljudi iz Sarajeva. Znači ne preko naših ljudi iz Općine, ne preko ljudi iz Tuzle, nego preko ljudi iz Sarajeva. Tako da su gospoda inspektori bukvalno dignuti na vikendicama i oni predstavnici iz Tuzle. Tad su uzeti pravovremeno uzorci vode i analizirana je. U sastavu Spreče je u tom periodu, u ta tri dana amonijaka bilo od 50-150 puta više od dozvoljenog za tu kategoriju vode. Znači u tom periodu Spreča nije pripadala ni prvoj ni drugoj ni trećoj kategoriji vode. Ona je bila van kategorije. Da bi nama pojedini pokušali da ispiru mozak kako je bio nizak vodostaj Spreče, kako je riba izgubila kisik, znači nije riba otrovana nego je igunula zbog kisika. Ovom analizom koju smo uspjeli dobiti jedva, čak su nam i ovo osporavali. Nalaz ribe nismo dobili. Zašto? Udruženje je naše malo i upravo zbog ovih trovanja mi više nemamo čak ni osnovnog izvora finansiranja. Kome mi da prodajemo dozvole za ribolov ako nemamo ribe u Spreči. Analiza tkiva ribe koju vrši Institut u Sarajevu i u Mostaru košta 900,00 KM po komadu. To je toksikološki nalaz i nalaz tkiva. A mi moramo za svaku analizu da uzmemo od svake ribe po jedan komad. I sad ako Spreča u prirodu kad ima ribe ima 15-20 vrsta ribe, onda se trebamo zapitati koliko nama treba para za jednu analizu. I ovo do prije par godina smo plaćali mi nalazu vode. Međutim, zahvaljujući jednom čovjeku iz agencije, koji je sada u penziji, vrše i ne plaćamo. I ovo su nam bili osporili inspektori iz Tuzle, kantonalni i federalna inspektorica Tenzila, ovaj nalaz čak i da nam ga daju. Kad sam ja nazvao direktora Delića on mi je lično uputio nalaz analize. Ja mogu ovdje da konstatujem da neko svjesno radi nama ovo što radi. Svi se gore bore za zaštitu jezera Modrac, čak i ova zajednica ribara koja je gore oformljena bere kajman, a nama ni sirutka ne dolazi. Dobijaju donacije i od Sode i od Koksare, od Cementare, od Općine Lukavac, Općine Tuzla, od Kantonalnog ministarstva jednog, drugog ministarstva, a šta mi dobijamo, ovdje ribari. Ponavljam dobijamo otrov i dobijamo bolest. Ovom prilikom, znači više ne molim, nego tražim, ne ja nego mi ribari tražimo da Općinsko vijeće Gračanica pokrene inicijativu jednom za svagda da se zaštiti rijeka Spreča, da se počne sprovoditi Zakon o vodama. Tražim da se uputi dopis resornim ministarstvima, Vladi TK i Skupštini TK i da to bude posljednje upozorenje. Nećemo više da se dopisujemo ni sa kim, jednostavno ćemo ovdje da napravimo bez najave blokadu, a to garantujem 100% ćemo uraditi. Ne samo da ćemo blokirati glavnu magistralu, imamo podršku ribara iz drugih općina koji su rekli, samo nam javite, blokirat ćemo komplet kanton ako treba. Ove godine je udruženje ostalo bez finansija upravo zbog trovanja. Nismo išli ni na takmičenja koja smo do sada uvijek posjećivali, dok smo imali nekih finansija išli smo. Ovo što smo išli na takmičenja, organizovali smo i jedan kup na rijeci Spreči i to smo organizovali mi o svom trošku, mi ribari. Do ove godine smo dobijali, da kažem neku injekciju od Općine Gračanica. Ove godine nismo dobili ni "i" od injekcije. Godpodo, pitam sada ja vas, treba li nama Spreča i Sprečko polje? Ako ne treba vama, ne treba ni nama ribarima. Mi smo već došli do tog stadija da moramo da zatvorimo udruženje. Mi više ne možemo ovako raditi. I ako mi nemamo podršku od vas, od nove godine mi ćemo zatvoriti udruženje.”

Predsjedavajući Vijeća Edin Ibrišević je konsatovao da će Vijeće uputiti dopis resornim ministarstvima i vladama da od ovih koji zagađuju, traži, da se poštuje Zakon o vodama.

Prešlo se na raspravu o predloženom dnevnom redu 13. sjednice Općinskog vijeća Gračanica.

Nije bilo učesnika u diskusiji i dnevni red 13. sjednice Vijeća je usvojen jednoglasno sa 30 glasova "ZA" i glasi:

1. **ODLUKA O IZMJENAMA I DOPUNAMA BUDŽETA OPĆINE GRAČANICA ZA 2013. GODINU**  
Izjavitelj: Nusret Helić, Općinski načelnik
2. **NACRT-BUDŽET OPĆINE GRAČANICA ZA 2014. GODINU**  
Izjavitelj: Nusret Helić, Općinski načelnik
3. **NACRT-ODLUKA O NAČINU IZVRŠAVANJA BUDŽETA OPĆINE GRAČANICA ZA 2014. GOD.**  
Izjavitelj: Nusret Helić, Općinski načelnik
4. **ODLUKA O USVAJANJU I PROVOĐENJU REGULACIONOG PLANA „CENTAR“ GRAČANICA**  
Izjavitelj: Aida Hodžić, šef Službe  
(**Napomena:** Grafički prilozi i CD sa Regulacionim planom će biti dostavljeni vijećnicima naknadno putem klubova)
5. **ODLUKA O PODIZANJU SPOMEN-OBILJEŽJA U mZ-i DOBOROVCI GORNJI**  
Izjavitelj: Senaida Šaković, šef Službe
6. **IMENOVANJE KOMISIJE ZA UTVRĐIVANJE PROMETNE VRIJEDNOSTI NEPOKRETNOSTI I PRAVA**  
Izjavitelj: Zijad Dedić, šef Službe
7. **IMENOVANJE I RAZRJEŠENJE ČLANOVA I PREDsjedNIKA OPĆINSKE IZBORNE KOMISIJE**  
Izjavitelj: Dženana Tukulj, predstavnik Konkursne komisije
8. **POLITIKE SOCIJALNOG UKLJUČIVANJA OPĆINE GRAČANICA 2014. - 2018. GODINA**  
Izjavitelj: Selma Hukić, predstavnik Savjeta za socijalno uključivanje
9. **IZVJEŠTAJ O PROVOĐENJU LOKALNOG AKCIONOG PLANA ZAŠTITE ŽIVOTNE SREDINE (LEAP) OPĆINE GRAČANICA U 2012. GODINI**  
Izjavitelj: Razija Junuzović, viši stručni saradnik za planiranje lokalnog razvoja
10. **INFORMACIJA O STANJU I USLOVIMA RADA VIJEĆA MJESNIH ZAJEDNICA NA PODRUČJU OPĆINE GRAČANICA**  
Izjavitelj: Edin Ibrišević, predsjedavajući Općinskog vijeća
11. **RJEŠENJA I zaključCI Imovinsko-pravne službe**  
Izjavitelj: Aida Hodžić, šef Službe

## **TAČKA 1:**

### ODLUKA O IZMJENAMA I DOPUNAMA BUDŽETA OPĆINE GRAČANICA ZA 2013. GODINU

Uvodno obrazloženje po prvoj tački dnevnog reda dao je Općinski načelnik Nusret Helić: “Uvaženi predsjedavajući i radno predsjedništvo, poštovani vijećnici, gosti i mediji, sve vas skupa podzdravljam i želim uspješan rad na današnjoj sjednici Općinskog vijeća, sa nadom da ćemo i danas donijeti dobre odluke i raditi u interesu naših građana, kao što smo to i do sada činili.

Dozvolite mi da dam uvodne napomene i obrazložim rebalans budžeta Općine za 2013.godinu.

Zakon o budžetima u Federaciji BiH je regulisao u kojim slučajevima dolazi do rebalansa:

Ako se tokom budžetske godine zbog nastanka novih obaveza za budžet ili drugih razloga povećaju rashodi i izdaci, odnosno smanje prihodi ili primitci budžeta, pa se budžet ne može uravnotežiti, pristupa se izmjenama i dopunama budžeta.

U izmjenu budžeta može se krenuti i ako prihodi porastu u toku budžetske godine.

Dok se u većini općina i drugih nivoa vlasti rebalans vrši uglavnom zbog smanjenja prihoda, kod nas je stanje nešto drugačije.

Do rebalansa dolazi iz najmanje tri razloga:

1. Što su ukupni prihodi porasli u odnosu na planirane.
2. Zbog novih izdataka koji su rezultat odobrenih namjenskih sredstava viših nivoa vlasti ili nekih drugih.
3. Zbog potrebe za povećanjem nekih izdataka, da ne bi došlo do zastoja u funkcionisanju službi i djelatnosti i u realizaciji nekih projekata koje smo već započeli.

Vidjeli ste iz dostavljenih materijala, da po rebalansu budžet iznosi 11.561.194 KM i veći je od planiranog za 284.194 KM.

Šta se desilo?

Porezni prihodi su veći za 439.500 KM, bez obzira što su prihodi od PDV-a manji za 243.000 KM. Veći prihodi su prije svega rezultat povećanog ostvarenja po osnovu poreza na promet nepokretnosti od fizičkih lica (520.000 KM).

Neporezni prihodi su takođe veći za 267.000 KM i rezultat su većeg ostvarenja po osnovu rente i naknada od javnih površina (planirana sredstva od BH Telekoma za prokopavanje javnih površina) u skladu sa onom odlukom o kojoj je bilo riječi na prošloj sjednici Vijeća.

Manji su primitci i tekuće potpore ili grantovi za oko 500.000 KM.

Ukupni izdaci otplate duga (po kreditu i za sportsku salu) su u skladu sa planiranim prihodima i iznose takođe 11.561.196 KM, dakle budžet je uravnotežen.

Izdaci su planirani na bazi izvršenja za 9 mjeseci, procjene kretanja i potreba do kraja godine, kao i mogućnosti realizacije planiranih kapitalnih i drugih projekata.

Došlo je i do premještanja nekih stavki iz jedne grupe u drugu, zbog usklađivanja sa novim kontnim planom.

Većina toga je pojašnjeno u obrazloženju koje ste dobili uz materijal, a ja ću pokušati dati i dodatna pojašnjenja.

Nove stavke u budžetu zbog namjenskih sredstava, preknjižavanja ili novih potreba su:

- izdaci za nove matične knjige i izvode iz matičnih knjiga u skladu sa novim zakonom,
- izdaci za naknade po ugovorima 32.000 KM zbog nepopunjenih radnih mjesta,



- selektivno prikupljanje otpada 9.000 KM (zajednički projekat Eko-pak, Komus i Općina).
- Gračaničko keranje 15.000 KM (sredstva kantona) za njihov projekat,
- vodovod Bijela Polja 40.000 KM (sredstva kantona),
- izrada glavnog projekta geoloških radova 35.000 KM (naše učešće po kreditu EIB-a),
- istražna bušotina Pašalići 164.000 KM (sredstva kantona) projekat je završen,
- regulacija Sokoluše 70.000 KM (Federalna sredstva),
- unapređenje poljoprivrednog zemljišta 76.000 KM (sredstva kantona) za projekat iz namjenskih sredstava,
- izmiještanje glavnog cjevovoda, izgradnja javne rasvjete, nadzor i dr., oko mosta Šumarija 71.000 KM (sredstva bratskog grada Florija),
- karta upotrebne vrijednosti zemljišta 28.000 KM (sredstva kantona),
- vodovod Gornja Orahovica 16.500 KM (nova bušotina i radovi u vezi s njom).

Povećane su neke stavke i izdaci, kao što su:

- Zimska služba 10.000 KM (zbog potreba),
- održavanje mezarja 4.000 KM (pomoć u izgradnji ograde za Mednicu),
- povećana je većina stavki koje se odnose na namjenska sredstva za civilnu zaštitu (usklađivanja izdataka sa planom prihoda),
- grant za dvije nove mjesne zajednice 3.000 KM,
- jednokratne pomoći za tri hiljade (zbog većih potreba),
- grantovi klubovima i obaveze prema savezima zbog povećanih troškova i potreba,
- organizacija sajмова 26.000 KM (namjenska sredstva kantona),
- zbrinjavanje pasa lotalica 5.000 KM (zbog većih potreba),
- spomen obilježje u Škahovici 5.000 KM (veći izdaci po tenderu),
- put Lukavica-Malešići 5.000 KM (zbog većih potreba),
- putevi u Sokolu (ugovoreni iznosi još iz prošle godine i okončane situacije),
- putevi u Prijekom Brdu 5.000 KM (veći iznosi po tenderu),
- put Serhatlije - P.Brdo 9.000 KM (okončana situacija za projekat iz prošle godine),
- most Trnovci 5.000 KM (veći iznosi po provedenom postupku nabavke),
- putevi u Pribavi 8.000 KM (okončana situacija i sredstva građana),
- renta 40.000 KM (namjenska sredstva i veći prihodi).

Došlo je i do smanjenja nekih stavki, odnosno izdataka.

Čime smo se rukovodili u smanjenju:

- Racionalna potrošnja i stvarni potrebni izdaci koji se odnose na administraciju,
- smanjili ili odustali od nekih projekata koji neće biti realizovani u ovoj godini,
- smanjili i neke budžetske stavke ili pozicije čije smanjenje neće poremetiti funkcionisanje korisnika ili može čekati narednu godinu,
- smanjili stavke za neke projekte koje su započeli, a neće u cjelosti biti završeni u ovoj budžetkoj godini.

Navest ću neke primjere:

-Izdaci za plaće i doprinose su manji za 94.000 KM, jer nismo popunili upražnjena mjesta penzionisanih radnika i druga upražnjena radna mjesta, neka će uskoro biti popunjena, a za neke je konkurs u toku (ljudski resursi, komunalni redari, kućni majstori, pripravnik, sanitarni inspektor, stručni saradnik u računovodstvu i slično).

-Toplifikacija, manje 350.000 KM, jer se neće moći realizovati sredstva Eko-fonda do kraja godine zbog procedura.

Vodovodi Lukavica 70.000 KM, Piskavica 50.000 KM (jer nisu stvoreni uslovi za realizaciju) radi se o sredstvima kredita.

I neki materijalni izdaci i projekti koji se planiraju u nacrtu budžeta za 2014.godinu.

Da završim,

Ja očekujem da će se naše projekcije prihoda i rashoda ostvariti do kraja godine, kako je to i planirano ovim rebalansom i poduzet ćemo sve potrebne mjere u tom cilju.

Ako se nešto i ne realizuje učinit ćemo sve da to ne bude do nas i da godinu završimo sa suficitom. Eventualno ne realizovane projekte prenijet ćemo u 2014.godinu.

Ovo što je Vehid predložio za MZ-e mi ćemo to isplatiti. I žao mi je što su otišli ribolovci jer nije tačno da nisu dobili ništa. Da znate da mi plaćamo njihove prostorije i da smo do sada, ja mislim uplatili preko dvije hiljade, tako da nisu tačne informacije da neka udruženja nemaju podršku. Očito da neka udruženje misle da je dovoljno registrovati se i nasloniti na budžet. I mi ćemo morati u raspravi kod nacрта zauzeti neki stav prema udruženjima jer je sada od njih takva presija kao da treba neko plaćati sekretarice, direktorice i sl. Mi udruženja finansiramo kroz raspisivane projekte i neke male troškove prema administraciji. Evo toliko.”

Ovaj dokument razmatrala je Komisija za budžet i Komisija za propise i Statut i nisu imali primjedbi, što je predsjedavajući Vijeća i konstatovao.

Za diskusiju se javio Vehid Osmanović:

“Klub vijećnika SDP-a podržava Odluku o izmjenama i dopunama budžeta Općine Gračanica za 2013. godinu. Drago nam je što su prihodi veći od planiranih, što je rijetkost kod budžetskih organizacija. Sa zadovoljstvom možemo konstatovati da je većina projekata završena, a neki su u fazi realizacije i ugovaranja. Svi koji nisu iz raznih opravdanih razloga realizovani, prenešeni su u narednu godinu.”

Dino Dedić:

“Želim ispred Kluba LDS i Naše stranke da pohvalim ovaj budžet jer je ostvaren sa većim приходima i čestitamo. Želio bih da postavim jedno pitanje načelniku što se tiče vode u Škahovici, pomenuli ste Lukavicu i Piskavicu. Znači ako budemo imali sve pripremljeno ići će u proceduru”.

Odgovor da će ići i Škahovica dao je Općinski načelnik.

Hasan Fehratović:

“Iznijet ću mišljenja i stavove Kluba vijećnika SDA. Naravno, evo malo ćemo i prodiskutovati kada su u pitanju prihodi i ono što je bitno napomenuti i što je pozitivno je, da je stvarni suficit negdje oko 243.000,00 KM. I kad sam se već dotakao ove приходovne strane, mislim da je vrijedno pažnje ovdje kazati da bi ovaj budžet bio znatno veći da nije izostala podrška Vlade F BiH. Evo ja sam to zabilježio da je to preko pola miliona KM. A usput da kažem da je, evo da se dotaknem i sljedeće tačke, za narednu godinu u nacrtu budžeta planirano od

sedamsto hiljada KM, pa se postavlja pitanje ima li uopšte smisla planirati ove stavke. Kada su u pitanju izdaci, ono čime smo se mi najviše bavili je da su kapitalni grantovi, nabavke zemljišta, rekonstrukcija, investiciono održavanje i da pojasnim za javnost, to su infrastrukturni objekti vodosnabdijevanje, putevi, vodotoci itd. realizovani ili će biti realizovani do kraja godine, odnosno nisu brisani iz ovog budžeta. To je iznos negdje oko dva miliona i stristohiljada KM i da su, kažem ponovo, realizovani ili će biti realizovani do kraja godine. Dakle, preko 90% od planiranog. To je svakako i osnovni razlog što će Klub vijećnika SDA podržati ovaj rebalans budžeta. Ali za kraj samo još jedno pitanje. Dakle, pošto je do kraja godine ostalo oko tri mjeseca, šta je načelnice sa ovim projektima, a ima tu puno i vodosnabdijevanja i putne infrastrukture, koji nisu izbrisani iz rebalansa, a planirani su da budu odrađeni do kraja ove godine.”

Rahim Gadžić:

“Ja bih samo jednu sugestiju kad je u pitanju rebalans budžeta. Vidim imamo u rebalansu dva spomen-obilježja u Gornjim Doborovcima i Donjoj Orahovici, pa bih zamolio načelnika da to ima u vidu, da VMZ-a provedu proceduru i da to imamo u nacrtu budžeta da imaju isti status jer mislim da su to dva spomen-obilježja koja su ostala i vjerovatno mislimo svi da to realizujemo. Zatim ovi projekti koji nisu realizovani u budžetu, evo npr. MZ-a Stjepan Polje, da li će se u narednom periodu ti projekti realizovati do kraja ove kalendarske godine. I ovo, rekonstrukcija društvenog doma u Malešićima, planirano budžetom 62.000,00 KM a utrošili 60.000,00 KM, ne znam kako su to na rebalansu budžeta oni ostali s tim.”

Općinski načelnik je dao dodatno obrazloženje:

“Evo da još jednom podcertam, dakle, pokušat ćemo da sve realizujemo. Ja sam skeptik čini mi se samo za Stjepan Polje kad su putevi u pitanju, hoće li se oni organizovati i reći koja je to dionica. Što se tiče doma u Stjepan Polju ide, što se tiče puteva Prijeko Brdo, većina je završena procedura, za neke su ugovori potpisani i već od ponedjeljka krećemo. Dakle očekujem, ali sve što se ne realizuje mi ćemo predložiti zaključak da to bude u sljedećem budžetu. Isto to važi i za spomen-obilježja. Ako predprocedure budu gotove, premostit ćemo to do kraja januara da uđu u sljedeću godinu i da ide.”

Zatvorena je rasprava i prešlo se na izjašnjavanje.

Odluka o izmjenama i dopunama Budžeta Općine Gračanica za 2013. godinu usvojena je jednoglasno sa 30 glasova “ZA”.

Nakon toga data je pauza u trajanju od pet minuta.

## **TAČKA 2:**

### **NACRT-BUDŽET OPĆINE GRAČANICA ZA 2014. GODINU**

Uvodno obrazloženje je dao Općinski načelnik Nusret Helić:

“Uvaženi predsjedavajući, poštovani vijećnici, mediji i gosti,

Kod prve projekcije, odnosno nacрта budžeta za 2013. godinu pošli smo od smjernica i ciljeva fiskalne politike koje nam je dostavilo Ministarstvo finansija TK-a u kojima su utvrđene

visine prihoda po općinama od indirektnih poreza i poreza na dohodak. Takođe smo imali u vidu rebalans budžeta za 2013. godinu i procjene ostvarenja prihoda i rashoda do kraja godine.

Dobro smo analizirali i strukturu nekih prihoda koji su ove godine ostvareni iznad očekivanja (porez na promet nepokretnosti, renta i neki drugi), te smo ocijenili da će oni u narednoj godini drastično pasti ili bolje rečeno neće se moći ostvariti ni približno ovogodišnji. Ako tome dodamo i procjene da će doći do pada grantova viših nivoa vlasti zbog velikih budžetskih dubioza, onda je sasvim jasno da je budžet za 2014. godinu morao biti manji u odnosu na ovu godinu.

Prema Nacrtu koji je i dostavljen uz ostale materijale, planirani budžet za 2014. godinu iznosi 10.020.000 KM.

A sastoji se od:

1. Prihoda .....9.349.000 KM
2. Primitaka.....671.000 KM
3. Otplata.....724.000 KM
4. Izdataka.....9.295.500 KM

U odnosu na tekuću godinu i rebalans koga smo maloprije usvojili, budžet za 2014. godinu je planiran za 1.541.194 KM ili 13 %.

Kao što sam rekao na početku izlaganja, to je uglavnom rezultat očekivanih manjih poreznih i neporeznih prihoda, kao i tekućih i kapitalnih grantova.

Porezni prihodi su manji za 5 % u odnosu na tekući budžet, dok su neporezni manji za 7,94 %. Takođe su manji tekući grantovi za 32 % i primitci za 37 %.

U skladu sa procjenom prihoda planirani su izdaci, dakle 10.020.000 KM, što je u odnosu na tekuću godinu manje za 13,33 %.

Kakva je struktura rashoda:

1. Za plaće, naknade, troškove zaposlenih i Općinskih vijećnika, planira se 2.685.000 KM ili 26,80 %.

2. Izdaci za materijalne troškove, uključujući energiju, javnu rasvjetu, zimsku službu, komunalnu potrošnju, volontere, obaveze po kreditu EIB-a, deratizaciju, deminiranje, klizišta, Izbornu komisiju i niz drugih, planirani su u iznosu od 1.986.000 KM ili 19,82 % budžeta.

3. Tekući grantovi, uključujući i grantove pojedincima, mjesnim zajednicama, sportskim i drugim nevladinim organizacijama, vanjskim korisnicima i drugim, planirani su u iznosu od 1.996.000 KM ili 19,92 % budžeta.

4. Izdaci za kamate na odobrene kredite iznose 83.000 KM ili 0,83 %.

5. Tekuća budžetska rezerva 70.000 KM ili 0,70 %.

6. Kapitalni izdaci planirani su u iznosu od 2.225.500 ili 22,21 % budžeta.

7. Otplate duga iznose 724.500 KM ili 7,23 %, a odnose se na otplatu kredita po kapitalnim projektima u iznosu 499.500 KM i za sportsku salu 225.000 KM (ovo je ujedno i posljeni anuitet).

Kada su u pitanju kapitalni izdaci, oni su kao što ste vidjeli planirani u iznosu od 2.225.500 KM. Odnose se na neke projekte koji su započeti (namjenska sredstva), preneseni projekti iz ove godine, ne realizovani projekti iz kredita i neki drugi.

U okviru kapitalnih izdataka planirani su:

- Kapitalni grantovi drugim nivoima (toplifikacija, spomen-obilježja, vjerski objekti) u iznosu 440.000 KM.

- Vodovodi i geološka istraživanja 408.000 KM.
- Javna rasvjeta, završni radovi na zgradi Općine, regulacija Sokoluše, unapređenje poljoprivrednog zemljišta, poligoni i drugi u iznosu od 472.000 KM.
- Oprema za rad službi, parkomati, protugradna odbrana u iznosu od 150.000 KM.
- Prostorno-planska i druga dokumentacija, kao što je digitalizacija u katastru u iznosu od 100.000 KM.
- Rekonstrukcija i asfaltiranje puteva 655.000 KM.

Ako gledate stvarne potrebe, onda je ovo sigurno nedovoljno. Ovome treba dodati i 499.500 KM otplata anuiteta za kredit iz 2012. godine, jer se odnosi na kapitalne projekte. Onda je to već 1/3 budžeta. Sva druga pojašnjenja imate uz dostavljeni materijal.

Vjerujem da mnogi nisu zadovoljni, nisam ni ja, a moram vam priznati da smo do ovog nacrtu došli mnogo teže nego do bilo kog drugog. No, moramo biti svjesni da je manje prihoda, da je teža ekonomska situacija i da se svi skupa moramo još racionalnije ponašati, više raditi i pokušati realizovati i ovakav plan.

Ja se nadam da ćemo imati planirano ostvarenje budžeta za ovu godinu i da ćemo moći sve eventualno ne realizovane projekte iz ove godine prenijeti u 2014. godinu.

Takođe se nadam da ćemo obezbijediti i neka sredstva od viših nivoa vlasti, kroz druge fondove ili prekograničnu saradnju, te će i oni postati sastavni dio budžeta.

Predlažem da nacrt budžeta usvojimo, a da se javna rasprava vodi do 01. 12. 2013. godine.

Za organizaciju i provođenje javne rasprave zadužuje se Služba za poduzetništvo, lokalni razvoj i finansije.

Ja ću se potruditi da nakon provedene javne rasprave i zajednički probamo doći do najboljeg prijedloga Budžeta za 2014. godinu, uvažavajući sve prijedloge kako bismo svi bili podjednako zadovoljni, a isto tako i podjednako nezadovoljni. Evo toliko.”

Predsjedavajući Vijeća je naglasio da je Nacrt Budžeta za 2014. godinu razmatrala Komisija z budžet i Komisija za propise i Statut i nisu imali prijedloga ni sugestija.

Učesnici u raspravi su:

Mirza Omerdić:

“Bit ću vrlo kratak. Stav SDA je da je ovaj nacrt Budžeta za 2014. godinu solidna osnova za donošenje Budžeta u 2014. godini i da će vjerovatno kroz javnu raspravu i amandmanske procedure, doći ustvari do brušenja ovog nacrtu i donošenja budžeta koji će odražavati u najboljem svjetlu potrebe naših građana. S tim u vezi SDA podržava ovaj nacrt budžeta.”

Vehid Osmanović:

“SDP takođe podržava ovaj nacrt budžeta, a tokom javne rasprave će pokušati neke svoje primjedbe pretvoriti u prijedloge za budžet.”

Safet Pjanić:

“Kolege su otprilike rekly ono što sam i ja htio reći, Klub BPS-a podržava nacrt budžeta sa jednom opaskom, sa jednom sugestijom, da se zaista vodi računa o ravnomjernosti i racionalnosti sredstava jer znamo da je budžet manji za milion i po, da će troškovi ostati isti, da

su manja i kapitalna ulaganja. Moramo zaista biti obazrivi da ne bude amandmanskog, da se usaglasimo prije toga i da se prijedlog budžeta usvoji.”

Jasenka Ahmetašević:

“U nedjelju 27. 10. 2013. godine bila sam pozvana u MZ-u Gornja Lohinja od strane predsjednika VMZ-e Selme i sekretarice Devlete, gdje se okupila veća grupa građana, to jest održavao se zbor građana MZ-e. Jedina tačka dnevnog reda na tom zboru bila je Nacrt Budžeta Općine Gračanica za 2014. godinu. Poseban osvrt i velika diskusija vodila se za predloženo izdvajanje sredstava prema MZ-i, odnosno održavanje glavnog puta Gornja Lohinja-Donja Lohinja. I sa žaljenjem mogu da konstatujem da je građanstvo veoma razočarano prvobitnim predviđenim nacrtom budžeta. Kao što i sami znate Gornja Lohinja je jedina MZ-a gdje ni glavni put nema niti jedan metar asfalta. Dakle svi putevi, kompletna infrastruktura, svi putevi su makadami i to u katastrofalnom stanju. Od vremena II svjetskog rata put Gornja Lohinja-Seljanoša preko Sjedaljke bio je u funkciji. Takođe u vrijeme rata 1992.-1995. godina bio je u funkciji, sve do 2005. godine ili 2006. godine. Pokazivanjem naroda kada se pojavilo klizište na dva dijela nikada nije izvršena niti jedna intervencija i time je veza sa Općinom prekinuta. Put Donja Lohinja-Gornja Lohinja glavni je put gdje saobraća autobuska linija. U godini dana se 2-3 puta obavi posipanje rizlom sa cca do 100m<sup>3</sup> i sve do prve kiše, da bi put ponovo bio jad, čemer i bijeda u 21. vijeku. Razlog više što nisu urađeni potrebni niti se rade određeni nagibi, odvodnja površinske vode ili pak postavljanje propusnih cijevi i slično. Obećavano je više puta da će se bar glavni put Donja Lohinja-Bajrići, Gornja Lohinja-Vrba u dužini od 2 kilometra osfaltirati, ali od obećanja ništa. Stoga vas molim da vrlo ozbiljno razmislite kako i na koji način da i ovoj MZ-i omogućimo asfalt, kako bi njihova djeca i oni sami mogli ići u školu, na posao, u čistim cipelama, živjeti bez prašine u ljetnim danima i uživati sve druge pogodnosti koje pruža asfaltni put. U protivnom, ukoliko se ne ispune očekivanja građana MZ-e Gornja Lohinja kako stoji u pismu u cjelosti, u najmanju ruku polovično, ja kao vijećnik ovog cijenjenog Općinskog vijeća neću podržati budžet.”

Rahim Gadžić:

“Zamolio me predsjednik MZ-e Piskavica da predam načelniku papir na kojem su primjedbe na Nacrt Budžeta. Molio bih još jednom, ako postoji mogućnost da u narednom budžetu bude putni pravac koji povezuje Gradačac i našu općinu Gračanica. Općina Gračanica je uradila svoj dio puta, a to je put Međida Gornja-Trnovci. Ostala je još jedna mala kraća dionica između Trnovaca i Međide Gornje. U pitanju je ratni put, a građani su zainteresovani da prikupe više od 50% sredstava. Pošto je budžet u teškoj situaciji, za milion i po manji, znači da načelnik razmotri tu mogućnost jer je to interes građana iz više MZ-a koji žive na tom području i u pitanju je javni put. Toliko.”

Edin Ibrišević:

“Na strani 5. u stavkama rekonstrukcija i investiciono održavanje, stavka 7 rekonstrukcija puteva u Mališićima i stavka 16 rekonstrukcija puteva u MZ-i Stjepan Polje u nekom iznosu od 55.000,00 KM, ako bi se moglo ovdje iz budžetske rezerve da se iznađu određena sredstva da se to preimenuje u put Malešići-Stjepan Polje. Jednu putnu komunikaciju koja je značajna za ova oba sela i alternativni izlaz iz MZ-e Malešići, a značajna je i za MZ-u Stjepan Polje.”

Esad Tursunović:

“Prvo da načelnika napomenem, na prošlom nacrtu budžeta u Stjepan Polju je obećano da će ući u plan taj put Stjepan Polje-Malešići prema Lukavici, a ima i snimak sa sjednice po tom pitanju.”

Nije bilo više prijavljenih članova Vijeća za diskusiju i predsjedavajući Vijeća je definisao zaključak koji glasi:

- Usvaja se Nacrt Budžeta Općine Gračanica za 2014. godinu.

Nacrt Budžeta Općine Gračanica za 2014. godinu, stavlja se na javnu raspravu u trajanju do 01. 12. 2013. godine.

Javnu raspravu će provesti Služba za poduzetništvo, lokalni razvoj i finansije u skladu sa Odlukom o javnim raspravama u općini Gračanica („Službeni glasnik Općine Gračanica“, broj: 5/04).

Sve primjedbe, prijedloge i sugestije do 01. 12. 2013. godine mogu se dostaviti nadležnoj službi za provođenje javne rasprave i Stručnoj službi Općinskog vijeća.

Zaključak je usvojen jednoglasno, sa 30 glasova „ZA”.

### **TAČKA 3:**

NACRT-ODLUKA O NAČINU IZVRŠAVANJA BUDŽETA OPĆINE GRAČANICA ZA 2014. GOD.

Komisija za budžet i Komisija za propise i Statut su razmatrale Nacrt Odluke o načinu izvršavanja Budžeta Općine Gračanica za 2014. godinu i nisu imale primjedbi.

Odluka je usvojena jednoglasno, sa 30 glasova „ZA”.

### **TAČKA 4:**

ODLUKA O USVAJANJU I PROVOĐENJU REGULACIONOG PLANA „CENTAR“ GRAČANICA

Uvodno obrazloženje je dala Aida Hodžić, šef Službe za prostorno uređenje, navodeći postupak i procedure koje su provedene kao i tok javne rasprave o Nacrtu Odluke, na osnovu čega se došlo do prijedloga Odluke o usvajanju i provođenju Regulacionog plana „Centar“ Gračanica.

Elektronsku prezentaciju je iznio Damir Lukić, predstavnik IPSA-Instituta, nosioca izrade prijedloga Regulacionog plana.

Za diskusiju se javio Nihad Krajinović:

„Obzirom da ova odluka reguliše građenje u centru grada, prema ocjeni stručnih osoba trenutno na najbolji način, kako bi se zadovoljile sve građevinske forme, propisani zakoni i potrebe razvoja centra, klub vijećnika SDP OO Gračanica podržava ponuđeni prijedlog Odluke.

Predviđenom Odlukom i samim novim Regulacionim planom odgovorit će se svim zahtjevima i potrebama građana u narednom periodu. S druge strane kao i svaki projekat i ovim će vjerovatno biti nezadovoljnih, koji u narednom periodu u saradnji sa nadležnim stručnim službama, licima i ličnim angažovanjem, sugestijama i prijedlozima, pripremaju novi regulacioni plan u skladu sa potrebama grada.

Iskoristio bih izlazak za govornicu, govoreći o ovoj oblasti, sugerisati službenicima resorne službe posebno licima koja najčešće dolaze u direktni kontakt sa građanima, da maksimalno u svojim mogućnostima i predviđenim profesionalnim odgovornostima i obavezama, budu na raspolaganju građanima. Naime građani se žale da često, nepoznavajući propise službe i svoje obaveze, ne razumiju kako i na koji način da regulišu svoje zahtjeve u skladu sa zakonom.“

Nije bilo više učesnika u diskusiji i Odluka o usvajanju i provođenju Regulacionog plana „Centar“ Gračanica je usvojena jednoglasno, sa 22 glasa „ZA“.

#### **TAČKA 5:**

##### **ODLUKA O PODIZANJU SPOMEN-OBILJEŽJA U mZ-i DOBOROVCI GORNJI**

Nije bilo učesnika u diskusiji, a Komisija za propise i Statut nije imala primjedbi i Odluka o podizanju spomen-obilježja u MZ-i Doborovci Gornji je usvojena jednoglasno, sa 22 glasa „ZA“.

#### **TAČKA 6:**

##### **IMENOVANJE KOMISIJE ZA UTVRĐIVANJE PROMETNE VRIJEDNOSTI NEPOKRETNOSTI I PRAVA**

Kratko obrazloženje na Rješenje o imenovanju dao je Zijad Dedić šef Službe za upravu, naglašavajući da je rješenje predloženo, prije svega, iz razloga što je istekao mandat ranijoj komisiji. Naglasio je da je ranija komisija imala 5 članova, a novim rješenjem su tri člana zbog troškova rada komisije. Isto tako je kao predlagač predložio izmjenu rješenja tako da se dodaju i izamjenici za članove i to pod rednim brojem 4. Ahmetagić Ibrahim i pod rednim brojem 5. Buljubašić Muharem.

Nije bilo učesnika u diskusiji i uz prijedlog šefa Službe, Rješenje o imenovanju Komisije za utvrđivanje prometne vrijednosti nepokretnosti i prava usvojeno je jednoglasno, sa 27 glasova „ZA“.

Nakon toga predsjedavajući Vijeća je dao pauzu na traženje Kluba vijećnika SDA.

Nakon pauze prešlo se na nastavak sjednice Općinskog vijeća.

#### **TAČKA 7:**

##### **IMENOVANJE I RAZRJEŠENJE ČLANOVA I PREDSJEDNIKA OPĆINSKE IZBORNE KOMISIJE**



Učesnik u diskusiji je Hasan Fehratović:

„Ništa posebno, tamo stoji imenovanje i razrješenje. Radi se o dva rješenja i zbog slijeda stvari, a što je bila i sugestija na Komisiji za propise i Statut, da se prvo izjašnjavamo o razrješenju članova kojima je istekao mandat pa tek onda na izjašnjavanje o imenovanju predsjednika i člana Općinske izborne komisije.

Rješenje o razrješenju Buljubašić Zikrije, predsjednika Općinske izborne komisije i Duraković Osmana člana, usvojeno je jednoglasno.

Rješenje o imenovanju Zehre Mujačić za predsjednika Općinske izborne komisije i člana Duraković Osmana usvojeno je jednoglasno, sa 29 glasova „ZA“.

### **TAČKA 8:**

#### POLITIKE SOCIJALNOG UKLJUČIVANJA OPĆINE GRAČANICA 2014. - 2018. GODINA

Uvodno obrazloženje je dala Selma Hukić, predstavnik Savjeta za socijalno uključivanje Općine Gračanica:

„Gospodine predsjedavajući, zamjenice i predstavnice Stručne službe, gospodine Načelnice, uvažene vijećnice i vijećnici i ostali, sve vas toplo pozdravljam. Za one koji me već ne znaju, a takvih nema mnogo u ovoj sali, ja sam Selma Hukić i danas vam se obraćam ispred Savjeta za socijalno uključivanje Općine Gračanica čije je osnivanje inicirao Biro za ljudska prava Tuzla u kojem radim. Najprije želim da izrazim svoje neizmjereno zadovoljstvo što sam danas ovdje ponovo s vama, naročito imajući u vidu povod. Velika mi je sreća danas biti ovdje zbog toga što smo jedan jednogodišnji proces priveli kraju i što će taj proces danas, nadam se, dobiti svoj epilog na najbolji mogući način.

Naime, već ste upoznati da se Savjet u proteklom periodu bavio izradom Politika socijalnog uključivanja Općine Gračanica 2014. – 2018., strateškog dokumenta koji ćete danas ovdje, nadam se, usvojiti. Politike su prošle dug put od prednacrt do prijedloga i prilikom njihove izrade omogućen je uticaj svih zainteresiranih aktera, čime se potakla zajednička odgovornost u procesima planiranja mjera (a time i javne potrošnje) u cilju smanjenja socijalne isključenosti. Vi ste na prošloj sjednici Vijeća dobili nacrt dokumenta i informaciju o Javnoj raspravi koja je u Gračanici održana 10. 9., a koja je doprinijela konačnom poboljšanju teksta. Kako u periodu koji je za to bio predviđen Stručna služba Vijeća nije zaprimila niti jedan vaš pismeni prijedlog i sugestiju, u odnosu na Nacrt dokumenta, uneseno je nekoliko izmjena, i to kako slijedi:

- str. 5 – 8 ubačen je dio koji se odnosi na lokalnu samoupravu u F BiH i njene nadležnosti, s posebnim osvrtom na **mjesne zajednice**, koje pored toga što prostorno određuju lokalnu zajednicu, predstavljaju lokalnu društvenu infrastrukturu u kojoj se može realizovati niz mjera koje obezbjeđuju direktno učešće ili participacija građana u političkom i socijalnom životu, te mogu imati izuzetno veliku ulogu u slučajevima kad na njihovom području žive naglašeno marginalizovane i socijalno isključene grupe
- na str. 15 dodan je dio o tome da je potrebno najprije izraditi Akcion plan sa precizno definisanim aktivnostima koje će biti vezane za svaku pojedinu mjeru, nosiocima aktivnosti, izvorima finansiranja i vremenskim okvirom implementacije definisanih aktivnosti za svaku

godinu, te da je potrebno formirati Tim za monitoring i evaluaciju implementacije Politika u koji trebaju biti uključeni svi lokalni subjekti socijalnog uključivanja

- na str. 18 ubačena je Mjera 8. **Mjera 6:** Iniciranje i implementacija projekata s ciljem jačanja infrastrukturne, tehničke i ljudske podrške institucijama i organizacijama u oblasti poboljšanja socijalnog uključivanja ranjivih kategorija, posebno u rješavanju problema dnevnog zbrinjavanja, smještaja i njege osoba treće životne dobi i osoba sa invaliditetom, i

**Indikator:** Osnovan Dom za zbrinjavanje starih i iznemoglih lica koji pored usluga njege, higijene i ishrane, te medicinskih usluga osmišljava individualne i grupne aktivnosti i organizuje društvene događaje (proslave praznika, rođendane, društvene igre, izlete, razne kreativne radionice) i cjelokupan kulturno-zabavni život korisnika

- na str. 23 u **Mjeru 1.** Osiguranje bolje dostupnosti usluga zdravstvene zaštite osobama sa invaliditetom i poteškoćama u psihičkom i fizičkom razvoju, dodan je **Indikator:** U skladu sa Pravilnicima, osigurano pravo prvenstva na pružanje medicinskih pregleda i usluga osobama sa invaliditetom i poteškoćama u psihičkom i fizičkom razvoju u javnim zdravstvenim ustanovama

- na str. 29 ubačen je **Prioritet 3. Osnažiti mehanizme za kvalitetnije provođenje odgojno-obrazovnog procesa u predškolskim ustanovama i osnovnim školama**

**Mjera 1:** Jačanje kadrovskih kapaciteta stručnih timova u osnovnim školama i predškolskim ustanovama s ciljem obezbjeđivanja kvalitetnijeg odgojno-obrazovnog procesa

**Indikator:** Stručni timovi u osnovnim školama i predškolskim ustanovama kadrovski ojačani sa barem jednim novim zaposlenikom (defektolog, socijalni radnik ili psiholog)

**Indikator:** Pokrenuta inicijativa prema resornom kantonalnom Ministarstvu za uspostavljanje prakse asistencije u učionicama kroz razvoj stručne podrške nastavnom osoblju i djeci/omladini sa posebnim potrebama koje je Komisija za razvrstavanje i kategorizaciju djece i omladine ometene u psihološkom i tjelesnom razvoju usmjerila u redovnu školu

**Indikator:** Pokrenuta inicijativa za izmjenu i dopunu pedagoških standarda koji se odnose na angažovanje dodatnih profesionalaca u stručne timove osnovnih škola i predškolskih ustanova (npr. angažovanje defektologa po modelu da škola koja ima do 25 odjeljenja, angažuje 1 izvršioca, a škola preko 25 odjeljenja, 1 izvršioca)

- na str. 32 uz **Mjeru 3:** Otklanjanje postojećih arhitektonskih barijera i stvaranje fizičke pristupačnosti svim javnim institucijama i prostorima koje posjećuju lica koja se ne mogu samostalno kretati, dodani **Indikator:** Uspješnost provođenja *Pravilnika o osiguranju pristupačnosti javnih prostora i građevina osobama s invaliditetom i smanjene pokretljivosti*

**Indikator:** Uspostavljena zvučna semafora signalizacija koja pomaže slijepim i slabovidnim osobama pri prelasku prometnih raskrsnica

Uz **Mjeru 4:** Preveniranje stvaranja novih barijera za kretanje po javnim površinama, saobraćajnim komunikacijama, javnim i stambenim objektima, dodani **Indikator:** Standardi pristupačnosti integrisani u planove urbanog razvoja grada i **Indikator:** Broj registrovanih sankcionisanih prekršaja nepropisno parkiranih vozila koja sprječavaju nesmetano kretanje osoba sa invaliditetom i osoba smanjene pokretljivosti

- na str. 39 u Administrativne usluge Općine ubačene su Stručna služba Općinskog vijeća Gračanica i Općinsko pravobranilaštvo

- na str. 63 - 65 pojačan je dio u Analizi koji opisuje problematiku osoba treće životne dobi i penzionera

- na str. 65 – 68 pojačan je dio u Analizi koji opisuje problematiku mladih (obrazovanje, zapošljavanje, socijalna sigurnost, stambena problematika, zdravstvena zaštita, participacija, mobilnost i kulturna razmjena i slobodno vrijeme)

Iskoristila bih ovu priliku i s ovog mjesta posebno ukazala na problematiku s kojom se suočavaju roditelji djece sa poteškoćama u psihičkom, fizičkom i intelektualnom razvoju koja nisu obuhvaćena niti jednim vidom psihosocijalne pomoći, tretmana ili rehabilitacije bilo koje vrste koje bi im pružala stručna lica, pa su isti prepušteni sami sebi. Podsjetila bih na činjenicu da u Gračanici postoji izgrađen resurs u vidu Osmijehovog Centra na Bazenu koji zjapi prazan, a u čijoj je izgradnji u proljeće 2001. godine na volonterskoj osnovi učestvovalo 80 mladih iz Gračanice, Zavidovića i Brčkog, u okviru prve poslijeratne omladinske radne akcije u Gračanici koju je organizovalo Društvo „Osmijeh”. Nefunkcionisanje ovog Centra je dovelo do rascjepkanosti u pružanju usluga i dnevnom zbrinjavanju ove populacije (na malom području Gračanice djeluju čak 4 NVO koje se bave ovom problematikom), posljedica čega da je NVO sektor koji zastupa ovu kategoriju u Gračanici rascjepkan na čak 4 organizacije koje tako razdvojene nemaju snage, niti šanse ostvariti značajnije pomake u ovoj oblasti, što nanosi više štete nego koristi u pokušajima da se poboljša kvalitet života pomenute populacije. Iako problematika djece sa poteškoćama u psihičkom, fizičkom i intelektualnom razvoju vrlo slojevita i ne spada isključivo u domen nadležnosti općine, podhitno je potrebno iznaći mogućnosti kako bi se Centar stavio u funkciju.

Da zaključim, pitanja socijalnog uključivanja obuhvataju niz tema koje zahtijevaju širok pristup najprije u njihovom definisanju, a potom u iznalaženju i implementaciji odgovarajućih rješenja. Stoga je neophodan multisektorski pristup ovom problemu koji obuhvata različite nivoe vlasti i civilni sektor. Kroz rad Savjeta za socijalno uključivanje Općine Gračanica je ojačana uloga aktera iz svih sektora u lokalnom socijalnom razvoju i kreiran prostor za definisanje, pripremu i efikasnije provođenje lokalnih politika koje bi trebale donijeti pozitivne efekte na smanjenje socijalne isključenosti ranjivih kategorija stanovništva. Naš zadatak u narednom periodu je ojačati mehanizame koordinacije između različitih aktera socijalnog uključivanja i zapošljavanja u smislu boljeg razumijevanja uloge socijalne ekonomije, odnosno socijalnog poduzetništva i njenog potencijala za povećanje socijalne uključenosti unutar lokalne zajednice kroz značajniji angažman privatnog sektora.

Općina Gračanica je dokazala da je osjetljiva na socijalne probleme svojih građana i da želi poduzeti mjere i podržati projekte koji će dovesti do boljeg socijalnog uključivanja, te da ima sluha za uključivanje civilnog društva u kreiranje materijalne i društvene baze u kojoj građani mogu efikasnije rješavati svoje svakodnevne probleme.

Na kraju, se zaista od srca još jednom zahvaljujem predstavnicima lokalne uprave: Načelniku Heliću, predstavnicima/ama stručnih službi i predsjedavajućem Općinskog vijeća na odličnoj saradnji koja je dovela do poboljšanja kvaliteta odluka o socijalnom uključivanju i obezbijedila neizravno prisustvo i uticaj grupa koje su u opasnosti od socijalne isključenosti na mjestima gdje se odluke presudne za njihov napredak kreiraju i donose.

Iskreno se nadam da ćete prepoznati važnost ovog strateškog dokumenta za općinu Gračanica te podržati njegovo usvajanje i tako postati prva općina u BiH koja ima takvo nešto. Zahvaljujem vam se na pažnji!“

Učesnik u diskusiji je Sead Gazibegović:

„Ovaj materijal je doraden sa onim stvarima koje su ubačene i koje je razmatrao Klub vijećnika SDP-a i naravno ostajemo i dalje pri onome što smo i prišli puta rekli. Maksimalnu podršku za implementaciju svega ovoga dajemo. I naravno ubijeden sam da to nije samo stav Kluba SDP-a nego isvih vijećnika i svih onih koji mogu dati doprinos u implementaciji ovog materijala. Posebno mi je drago da je tu i mjera za osobe treće životne dobi i onda indikator, osnovan dom pa smo se već pitali kad ga prije osnovaše za ovaj mjesec dana. Ali jasno je da će to biti indikator, da je ta mjera uspjela kad se tako nešto uradi. Ja sam uvjeren da ćemo mi to započeti u najmanju ruku za mandata ovog vijeća. Započeti, znači uraditi projekat ako ništa više. Dakle još jednom pohvala ovom materijalu. I još sam nešto primijetio, još interesantnih stvari što je takođe za pohvalu, a vezano je za inicijativu da se, ako sam ja dobro razumio, pri Centru za socijalni rad pokrenu te aktivnosti da oni koji su na birou a zanimanja su im vezana za ovu problematiku, volonterski angažuju i da na takav način odrade pripravnčki staž. To je zbilja jedna dobra stvar i mislim da oni kojima je stalo da odrade priprevnčki staž i traže dalje posao iz ove branše, eto im prilike.“

Prijedlog Politike socijalnog uključivanja Općine Gračanica 2014. – 2018. godina, usvojena je jednoglasno, sa 30 glasova „ZA“.

#### **TAČKA 9:**

##### IZVJEŠTAJ O PROVOĐENJU LOKALNOG AKCIONOG PLANA ZAŠTITE ŽIVOTNE SREDINE (LEAP) OPĆINE GRAČANICA U 2012. GODINI

Nije bilo učesnika u diskusiji i Izvještaj o provođenju lokalnog akcionog plana zaštite životne sredine (LEAP) Općine Gračanica u 2012. godini usvojen je jednoglasno, sa 30 glasova „ZA“.

#### **TAČKA 10:**

##### INFORMACIJA O STANJU I USLOVIMA RADA VIJEĆA MJESNIH ZAJEDNICA NA PODRUČJU OPĆINE GRAČANICA

Uvodno obrazloženje po ovoj informaciji dao je Edin Ibrišević, predsjedavajući Općinskog vijeća:

„Samo bih dao par nekih uvodnih napomena. Znači, tamo stoji prema članu 30. Statuta Općine Gračanica stav 9. predsjedavajući Općinskog vijeća koordinira i nadzire rad VMZ-a. U cilju toga, ne u cilju neke da se razumijemo inspekcije, obišao sam sve mjesne zajednice, u cilju pomoći, dogovora i razgovora, a prije svega da sagledamo implementiranje izbornih rezultata u mjesnim zajednicama, a potom ove pravne, da kažem pravne aspekte u radu VMZ-a. Za sve ono ostalo, ono drugo kad je u pitanju, tu stoji izvršna vlast i načelnik sa svojim kabinetom. Prema analizi Informacije kasnije su uočeni neki propusti, čini mi se da se radi o Prijekom Brdu. Ispušeno je da se navede da postoji prostor MZ-e ali bi ga trebalo opremiti i nastaviti dalje sa radom. Evo ja sad otvaram raspravu po ovom materijalu.“

U diskusiji su učestvovali:

Ibrahim Hasić:

„Moram biti iskren. Nisam ja ove informacije ni pregledao uopšte, ali sam juče to čuo iz medija pa me to ponukalo, a nije mi na pamet padalo da izađem za govornicu. Mislim da je ova informacija, bar kad su Malešići u pitanju, sačinjena šablonski. Kaže, pregledom važećih

dokumenata u MZ-a utvrđeno je da sve MZ-e imaju Statut usaglašen sa Statutom Općine Gračanica, osim MZ-e Malešići kojoj je naloženo da na narednoj sjednici VMZ-e usaglasiti itd. itd. i da se usvoji Statut. Međutim Statut je usaglašen 99%, ali činjenica je da nije usvojen, možda će biti usvojen na narednoj sjednici, a možda neće biti ni Boga pitaj kad, jer ja odgovorno tvrdim da 99% MZ-a je sjelo napisalo zapisnik i usvojilo Statut. A u Malešićima neće biti usvojen Statut dok ne bude bilo 2/3 prisutnih. To treba da znate dobro. I nije tačno da MZ-a nema Statuta. Statut ima, i to važeći Statut, sve dok ne bude bio novi. A rekao sam novi će biti onda kad se steknu uslovi za njegovo usvajanje. Dalje, predsjedavajući obraćam se sada Vama, nije tačno da nema Poslovnika MZ-e Malešići, evo ga. Ja ne znam od kud Vama ta informacija, prema tome nemojte iznositi u javnost i stavljati u informaciju ono što nije tačno. Ne možete to ubuduće raditi, nego što kolega Hasulja ima običaj reći, pročitajte, odnosno pitajte šta ima MZ-a, a šta nema MZ-a. Ispade sada da je MZ-a u nekom zapečku, međutim MZ-a Malešići može važiti za uzor svima.“

Edin Ibrišević:

„Malo pojašnjenje. Svi podaci koji su skupljeni ovdje i u Informaciji, su prikupljeni na sjednici VMZ-e. Znači nije se predsjedavajući, kad je u pitanju ovo upuštao u tačno utvrđivanje nego na osnovu dobivenog, od članova VMZ-e. Kad je u pitanju MZ-a Malešići, nije bilo dato na uvid, nažalost kolega Hasić koji je zamjenik predsjednika VMZ-e, vjerovatno je opravdano tada bio odsutan ali je bio kvorum MZ-e tako da nisam dobio na uvid, nije mi pokazano. A kad je u pitanju Statut ja ću se malo osvrnuti na Statut Općine Gračanica. Član 123. kaže: „MZ-e su dužne uskladiti svoje statute sa ovim statutom u roku od tri mjeseca od dana njegovog stupanja na snagu“. Dalje kaže: „Stupanjem na snagu ovog statuta prestaju da važe odredbe Statuta MZ-e koje su u suprotnosti sa odredbama ovog statuta“. Datum 29. april 2009. godine. Ovdje ne treba misliti da se ide ka nekoj negativnosti. Znači sve ovo što se radilo i radi se samo da pospješimo rad i da nam rad bude što bolji i da idemo u što boljem smjeru. A nema ovdje nikakve zamjerke, niti ja imam na rad ni jedne MZ-e. Toplo sam primljen u svim MZ-a i lijepo je bilo, i mislim da ćemo ovu saradnju nastaviti i dalje na interes kako MZ-a tako Općine Gračanica, a prije svega u interesu svih građana koji žive na prostoru općine Gračanica. A evo ako vi sutra odlučite da ovo ne bude u Statutu ja ću to rado prihvatiti i da izbacimo iz člana 30 Statuta Općine stav 9., to bi i meni malo olakšalo moj rad. Zamolio bih medije da se ne iznose nikakve informacije koje su u pripremi dok one ne budu zvanično na Vijeću završene. Danas je ova informacija mogla biti odbijena, znači nikako prihvaćena, ili je moglo biti izmjena itd. Znači dok ne završi sjednica Vijeća, a i po Statutu ove informacije ne postaju veće jer svako ko radi može i grijehiti.“

Ibrahim Hasić:

„Ja se dobro sjećam da ste Vi bili u prethodnom mandatu sa mnom zajedno i vođena je javna rasprava i, između ostalog, najviše je akcenat stavljen na broj vijećnika u određenim MZ-a. Ja odgovorno tvrdim da više od 50% MZ-a nije sa utvrđenim brojem vijećnika u VMZ-e zadovoljeno. A posebno mislim da si i ti bio sa Muharemom u Malešićima kad je javna rasprava vođena i stav MZ-e Malešići je Vama bio dobro poznat. A sad odmah da Vam kažem. Lakše je skupiti 7, odnosno 8 ljudi nego 9. Puno znači kad nemaš jednog, a ponavljam nikad u MZ-i Malešići neće biti Statut usvojen dok ne bude većina u VMZ-e prisutna. Po meni predsjedavajući Vijeća kojeg ste Vi naslijedili najveći su krivci za ovakvo stanje.“

Hasan Puškar:

„Kolega Ibro, ja sam i tad tvrdio da nisu u skladu sa Pravilnikom usvojeni statuti mjesnih zajednica. Niko mi nije dao podršku da provjeri formiranje VMZ-a. Druga stvar, nije nama predsjedavajući najavio i ja nisam bio pripremljen da dam na uvid Pravilnik, Poslovnik o radu,

Statut. I znam da je nešto bilo na radiju juče ili prekjuče. Mislim da je i u Sokolu nešto falilo od službenih akata. Znači, ubuduće svi treba da znamo kad on želi doći u neku kontrolu, da mi pripremimo poslovnike. Ja u potpunosti podržavam to tvoje jer sam ja i prije tri četiri godine, kad su statuti usvajani isto to tvrdio, ali me niko nije htio podržati. Kad su statuti usvajani kod kuće se sjede i napiše, potpiše i gotovo.“

Sead Gazibegović:

„Da malo realiziram ovo i da ukažem na jednu grešku, ovdje gdje su opšti podaci i broj stanovnika, jer sam pročitao koliko stanovnika po popisu ima u BiH. 1991. godine Gračanica je imala 12.700 stanovnika, a sad ima 13.500. Ipak je velika razlika. Mi baratamo sa činjenicom da MZ-a Gračanica broji nekih 17.000 stanovnika. Previše je velika razlika da bude u zvaničnom dokumentu.“

Edin Ibrišević, predsjedavajući Općinskog vijeća:

„Prema podatku dobijenom u MZ Gračanica i prema nezvaničnom podatku sa nedavnog popisa stanovništva MZ-a Gračanica broji 13.500 stanovnika“

Nije bilo učesnika u diskusiji i Informacija o stanju i uslovima rada vijeća mjesnih zajednica na području općine Gračanica je usvojena sa 29 glasova „ZA“ i 1 „PROTIV“.

#### **TAČKA 11:**

##### **RJEŠENJA I zaključCI Imovinsko-pravne službe**

Zaključak Imovinsko-pravne službe usvojen je jednoglasno sa 30 glasova „ZA“.

Sjednica je završena u 15.00 sati.

Zapisnik vodila: Azra Mustajbašić

Tonski snimak sjednice uredno je arhiviran.

Azra Mustajbašić

PREDSJEDAVAJUĆI  
OPĆINSKOG VIJEĆA  
mr.sci. Edin Ibrišević